



REPUBLIKA E SHQIPËRISË

KËSHILLI I LARTË I PROKURORISË

V E N D I M

Nr. 14 datë 21.01.2019

PËR CAKTIM NË POZICION TË PËRKOHSHËM

Në Tiranë, sot më datë 21.01.2019, Këshilli i Lartë i Prokurorisë, pasi dëgjoj në seancën plenare të datës 21.01.2019, relacionin e Komisionit të Karrierës si dhe mendimet e paraqitura nga Anëtarët e Këshillit në mbledhje

K O N S T A T O J

Prokuroria e Apelit për Krime të Rënda është themeluar dhe ushtron veprimtarinë e saj pranë Gjykatës së Apelit për Krime të Rënda, Tiranë. Kjo prokurori ka në organikën e saj dy prokuror. Me ngritjen e Këshillit të Lartë të Prokurorisë, Prokurori i Apelit për Krime të Rënda, z.Bujar Sheshi, është anëtar i këtij Këshilli, për një mandat 5 vjeçar.

Për shkak të ngarkesës së çështjeve që duhet të përballojë prokurori i vetëm dhe natyrës së tyre, është emergjente plotësimi i vendit të lirë të përkohshëm "Prokuror" pranë Prokurorisë së Apelit për Krime të Rënda, Tiranë. Në kuptim të ligjit "Për statusin e gjyqtarëve dhe prokurorëve në Republikën e Shqipërisë", neni 47/2, pozicioni i lirë i sipërpërmendur konsiderohet i përkohshëm, duke qenë se prokuror z.Bujar Sheshi, gëzon të drejtën për t'u kthyer në atë pozicion.

Nga ana tjetër Kushtetura e Republikës së Shqipërisë në pikën 8 të nenit 179 parashikon se: *"...Prokurorët pranë Prokurorisë së Posaçme do të emërohen brenda dy muajve nga krijimi i Këshillit të Lartë të Prokurorisë, sipas ligjit. Pas krijimit të Prokurorisë së Posaçme, Prokuroria për Krimet e Rënda do të pushojë së funksionuari"*. Këshilli i Lartë i Prokurorisë ka hapur garën, me qëllim krijimin e prokurorisë së posaçme, dhe në interpretim të afateve kohore të përcaktuara në Kushtetutë, pozicioni i prokurorit z.Bujar Sheshi, në Prokurorinë e Apelit të Krimeve të Rënda, konsiderohet i lirë për një afat kohor **jo më shumë se tre muaj**¹.

Në nenin 59 "Caktimi i përkohshëm", të Ligjit nr.96/2016 "Për Statusin e Gjyqtarëve dhe Prokurorëve në Republikën e Shqipërisë", parashikohet se: *"1.Pozicioni i magjistratit mund të plotësohet përkohësisht, kur magjistrati me pozicion të përhershëm nuk është në gjendje të"*

¹ Pavarësisht parashikimeve të tjera ligjore, kushtetuta kërkon që Prokuroria e Posaçme të krijohet brenda dy muajëve nga krijimi i Këshillit të Lartë të Prokurorisë, kështu që pozicioni i prokurorit z. Bujar Sheshi, si prokuror në Prokurorinë pranë Gjykatës së Apelit të Krimeve të Rënda, nuk mund të konsiderohet i lirë më shumë se tre muaj, për shkak se kushtetuta dhe ligji parashikojnë se me krijimin e Prokurorisë së posaçme, prokuroria e Apelit të Krimeve të Rënda do të shkrihet.

ushtrojë funksionin për një periudhë jo më shumë se tre muaj, për shkak të: a) caktimit në pozicione të tjera; b) arsyeve të tjera të parashikuara nga ligji.4. Këshilli merr vendim për rastet e parashikuara në pikën 2, të këtij neni, si dhe përcakton datën e fillimit dhe datën e mbarimit të periudhës kohore, në të cilën pozicioni mund të plotësohet përkohësisht”.

Në këto kushte çmohet e domosdoshme caktimi përkohësisht i një prokurori në prokurorinë pranë Gjykatës së Apelit të Krimeve të Rënda.

Në nenin 59 të ligjit të sipërcituara nuk parashikohen kushtet dhe kriteret, që një prokuror duhet të plotësojë për t’u caktuar përkohësisht në një pozicion magjistrati. Bazuar në interpretimin sistematik, të dispozitave ligjore të pjesës së tretë të Ligjit 96/2016 “Për Statusin e Gjyqtarëve dhe Prokurorëve në Republikën e Shqipërisë“ të titulluar “Zhvillimi i karrierës së magjistratëve”, rezulton se prokurori që caktohet deri në tre muaj në një pozicion të ngelur bosh përkohësisht, duhet të plotësojë kushtet dhe kriteret, që kërkohen nga ligji për ushtrimin e detyrës për atë pozicion. Gjithashtu fryma e ligjit është e tillë, që lëvizjet e magjistratëve edhe përkohësisht duhet të kryhen nga Këshilli, duke pasur kujdes, që të mos dëmtohen hetimet apo proceset gjyqësore të çështjeve penale që ka në dorë prokurori, që do të caktohet përkohësisht në pozicionin e mbetur bosh.

Në rastin konkret pozicioni i ngelur bosh është pozicioni “prokuror” pranë Prokurorisë së Apelit të Krimeve të Rënda. Në pikën 4 të nenit 47 të Ligjit 96/2016 parashikohet se: *“Magjistrati mund të ngrihet në detyrë në pozicione pranë gjykatave ose prokurorive të shkallës së dytë, nëse ka ushtruar funksionin jo më pak se shtatë vjet në shkallën e parë, nga të cilat të paktën pesë vjet në fushën e së drejtës përkatëse të përshtatshme për pozicionin e lirë, duke përfshirë edhe përvojën si magjistrat i komanduar”*.

Këshilli i Lartë i Prokurorisë, mbi bazën e propozimit të Komisionit të Karrierës çmon se prokurori z. Isa Jata përmbush kriteret ligjore të kërkuara nga ligji për të ushtruar funksionin përkohësisht si prokuror në prokurorinë pranë Gjykatës së Apelit të Krimeve të Rënda, për shkak se ka ushtruar funksionin e Prokurorit për më shumë se 24 vjet dhe aktualisht nuk ka çështje penale në hetim apo në gjykim, që mund të dëmtohen nga caktimi i përkohshëm.

Nga të dhënat e marra nga sektori i Burimeve Njerëzore në Prokurorinë e Përgjithshme, rezulton se me vendimin e datës 01.07.1994 të Këshillit të Lartë të Drejtësisë, prokurori z. Isa Jata është emëruar prokuror në Prokurorinë e Përgjithshme, detyrë të cilën e ka kryer deri më datë 08.01.2015, datë në të cilën me Dekret të Presidentit të Republikës është transferuar në Prokurorinë e Rrethit Tiranë, detyrë të cilën e kryen edhe aktualisht. Gjatë karrierës së tij, ai është komanduar dy herë nga Prokurori i Përgjithshëm të ushtronte funksionin e Prokurorit të Apelit në Prokurorinë e Apelit për Krimet e Rënda. Me urdherin nr. 208/3 date 09.01.2018, të Prokurorit të Përgjithshëm, prokurori Z. Isa Jata është caktuar në pozicion të përkohshëm, pranë Prokurorisë së Përgjithshme në grupin e punës për hartimin e projekt raporteve në kuadër të procesit të rivlerësimit².

Për sa më sipër në mbështetje të nenit 149/a të Kushtetutës së Republikës së Shqipërisë, nenit 59 pika 1 dhe 4 të ligjit 96 të vitit 2016 “Për Statusin e Gjyqtarëve dhe Prokurorëve në Republikën e Shqipërisë“, si dhe neneve 164/8, 166/2, 189/1/a të Ligjit 115 “ Për Organet e Qeverisjes së Sistemit të Drejtësisë“ Këshilli i Lartë i Prokurorisë

² Zyra e prokurorit të Përgjithshëm , përgati raportet e vlerësimit për procesin e rivlerësimit në kuadër të ligjit 84/2016 “Për rivlerësimin kalimtar të Gjyqtarëve apo prokurorëve në Republikën e Shqipërisë;”, deri në momentin e krijimit të Këshillit të Lartë të Prokurorisë. Në bazë të ligjit organ i vlerësimit të aftësive profesionale është Këshilli i Lartë i Prokurorisë.

VENDOSI

1. z.Isa Jata, prokuror në Prokurorinë pranë Gjykatës së Shkallës së Parë Tiranë, të caktohet përkohësisht të ushtrojë funksionin e prokurorit në Prokurorinë pranë Gjykatës së Apelit të Krimeve të Rënda.
2. Pozicioni i prokurorit z. Bujar Sheshi, në Prokurorinë pranë Gjykatës së Apelit të Krimeve të Rënda, do të plotësohet përkohësisht nga prokurori z. Isa Jata, nga data 22.01.2019-21.04.2019.
3. Të njoftohen me këtë vendim prokurori Isa Jata, Prokuroria pranë Gjykatës së Shkallës së parë Tiranë dhe Prokuroria pranë Gjykatës së Apelit të Krimeve të Rënda.
4. Ky urdhër hyn në fuqi menjëherë.

KËSHILLI I LARTË I PROKURORISË



**KRYETARI
GENT IBRAHIMI**

**ANËTAR
ANTONETA SEVDARI**

**ANËTAR
BUJAR SHESHI**

**ANËTAR
NURIHAN SEITI**

**ANËTAR
ARBËN DOLLAPAJ**

**ANËTAR
GENTJAN OSMANI**

**ANËTAR
SANDËR BECI**

**ZV/KRYETARI
ALFRED BALLA**

**ANËTAR
BESNIK CANI**

**ANËTAR
KOSTAQ BELURI**

**ANËTAR
TARTAR BAZAJ**